

Inhalt

FRIEHLINGSERWACHE	7
ALLES GUDE ZUR KOMFERMATION	10
DO KANNSCHT MOL SEHE.....	15
AWWER SAACH NIX!	18
ÄNER GEHT NOCH.....	21
WILLSCHT WAS TRINKE?.....	23
ALLES GAR KÄ PROBLEM	28
DE BILDUNGSURLAUB	30
ICH WÄÄSS ÄFACH ALLES	36
MIR ISSES EIGENTLICH EGAL.....	39
DANN GEH MER HALT	43
IM WARDEZIMMER	47
DE GSUNDHEITS-RAP	50
WIE S FRIEHER WAR.....	52
NOCHBERSCHAFT IM HEMSHOF	55
DE KUDDESCHORZ	61
ICH KUMM AUS DE STADT.....	64
ANNERSCHT HALT	66
WETTERLEUCHTEN.....	72
MOIN SCHÄÄNER GAADE.....	74
DE SELWER GEMACHDE ADVENTSKRANZ	76
DE NIKOLAUS VUN DE MARIEKÄRSCH	79
ICH BIN EN WOIHNACHTSFREAK.....	83
DIE AUTORIN	86
AUSSERDEM VON DER AUTORIN ERSCIENEN.....	87

Alles Gude zur Komfermation

Also, ich wääß net, wie s eich geht, awwer ich hab s gern e bissel stimmungsvoll. Deswege hawwisch mich aa so gfräät, wu mich moi Nichte, die Tanja, uff die Komfermation vun ihre Große oigelade hot.

»Des Klääd fer die Leonie kaaf awwer ich«, hawwisch glei gsaat. Ich hab dann e rodes rausgsucht, kniefrei, diefer Ausschnitt, so bissel glänzisch, todschick. Ich mään, des soll se jo später aa noch emol zu annere Aläss traache känne – in die Disco odder so. Awwer die Kinner heitzedaachs, die sin jo so spießisch. Schwarz odder dunkelblau hot s soi misse. Ich versteh des net. Na ja, muss se jo selwer wisse, die Klää. Awwer e bissel enttäuscht war ich schun.

Un dann in de Kärsch, des war aa so e Ding. Ich bin extra frieh uffgstanne, hab in de erschde drei Reihe glei Handdischer iwwer die Kärschebänk gelegt. Ich mään, mir sin e großi Familie un net dass äner do hockt un de annere dort. Kummt doch so en Hilfssheriff vun dem Parrer her – Presbyter hääßen die, glaawisch – un saacht, annere Familie wollten aa noch en Platz un des deet net gehe mit dem Freihalte. Awwer dem hawwisch s gewwe.

»Do kammer mol widder sehe, wie rickständisch die Gemeinde hier sin«, hawwisch zu em gsaat. »An jedem Pool in Teneriffa kannscht des mache, awwer bis zu de evangelisch Kärsch in Deitschland hot sich

s noch net rumgsproche.« No ja, de Leonie zulieb hawwisch die Handdischer dann widder abgeraamt. Net dass des Kind des noch ausbade muss.

Nooch un nooch sin aa die annere kumme un so e halwi Stunn bevor s losgange is, war die Kärsch gerammelt voll. Moi Freundin, die Magret, hot sich glei newer mich ghockt. Mir hänn uns schon e Weil nimmi gsehe ghabt, do war mer des grad recht. No hämmer uns endlich emol in Ruh unnerhalte känne. Aa iwwer de Lissel ihr Klääd, wu se in de Kärsch aghabt hot. Also wie mer in dem Alder so was traache kann. Ich mään, schlank isse jo, awwer wie hääßt doch der Spruch: Hinne Lyzeum un vorne Museum. Umeeglich! Ja, un wann d so dohockscht, no kummscht jo vum Hunnertschde ins Dausendschde. Ich guck grad uff die Uhr un frää mich, dass mer noch zeh Minudde hänn, stellt sich net der Parrer vorne hie un fangt aa zu babble. Er wollt korz um Ruhe bitte, hodder gemäänt, awwer ich hab zu de Magret gsaat: »Der hot noochher noch genuch Zeit. Jetz sin erscht emol mir draa.« Ich hab mich dann aa bestädischt gfielt, weil die annere Leit hänn des schoints genauso gsehe. Also, bei uns in de Reih un vornedraa, do war kän äänder ruhisch – außer de Tanja. Awwer ich mään, dodefier war s jo aa ihr Dochder, wu komfermiert worre is. Do sieht mer des vielleicht e bissel annerscht. Wu s dann losgange is, hämmer unser Gspräch unnerbroche. Mer is jo net uheeflich. Ich hab bloß noch korz zu de Magret gsaat: »Wann noochher die Musik spielt, redde mer weider.«

Wu dann die Komfermande oimarschiert sin – ich wollt grad gugge, wu unser Leonie laaft – do sin uff ämol alle uffgstanne. Ich hab iwwerhaupt nix mehr gsehe. Awwer die Leit sin jo so ricksichtslos. No hot mich noch die Tanja am Arm gezoppelt.

»Steh uff«, hot se gepischbert.

»Warum?«, hawwisch zurick gepischbert.

»Des macht mer so!«

»Woher soll dann ich des wisse? Mir saacht jo käner was.«

»De Parrer hot s vorhin erklärt. Awwer du hoscht jo mit de Magret babble misse.«

Zum Glick hänn die um uns rum »Pscht! Pscht!« gemacht, sunscht hädde mer noch Krach kriggt midde in de Kärsch.

De Parrer hot dann gsaat, mer soll die Handys ausmache. A, do lach ich jo. Des mach ich net emol im Kino, no werr ich s in de Kärsch mache. S wär aa gar net gange, weil die Hilde wollt mich nämlich noch arufe wegge de Sonderagebode in de Rhoigalerie. Un bei aller Liewe zu de Leonie, des kann ich mer jetz wirklich net entgehe losse.

Awwer sunscht, ich muss saache, die hänn des streckeweis schun kloor gemacht. Die Kinner hänn am Altar gstanne un hänn so Sprichelcher uffgsaat. Wu die Leonie draa war, bin ich glei vorgerennt un hab do mit Tele un Blitz un alle Schikane – wääscht jo – so klack – klack – klack. Ich mään, e Komfermation hoscht jo bloß ämol im Lewe. Ich glaab, die Leit hänn des aa verstanne.

Awwer saach nix!

Hänner des schun gheert vum Karl? Ich hab s jo net aus erschder Hand. Deswege isses aa mit Vorsicht zu genieße. Wer wääß, ob des iwwerhaupt stimmt. Awwer gedenkt hätt ich s net vun em. Ausgerechent de Karl! Dodebei hot der so e liewi Fraa. Die Hilde hot aa gsaat: »Der kann doch froh soi, dass er die hot.« Un jetz deet der uff soi alde Daache noch emol was mit änere Jingere afange! Also – wann s wohr is.

Awwer des derf mer nadierlich net jedem verzehle. Nur Leit, wu mer sich sicher soi kann, dass die nix saachen. Die Hilde hot net fer ummesunscht zu mer gsaat: »Awwer saach nix.« No hawwisch mer noch gedenkt, die Lissel werd Aache mache, wann die heert, dass ich des schun widder wääß. Weil vun de Hilde kann die des net hawwe. Die reddten jo schun ewisch nix mehr minanner. Un tatsächlich – die hot noch gar kä Ahnung ghabt. Obwohl die mit de Kättche ganz eng is, mit derre alde Kaadeplätsch. Nur – ich hab jo erscht emol rausfinne misse, ob die dodevun wirklich noch nix erfahre hot. Wie immer bin ich ganz diplomadisch vorgange – ich mään, des hawwisch jo druff – un hab gsaat: »Lissel, hoscht du des vum Karl schun gheert?« Un so wie die ihr Aache gstellt hot, war die dodal ahnungslos. Ach war des schää, dass ich endlich emol ebbes vor derre gewisst hab. Ich hab nadierlich glei zu re gsaat: »Awwer saach nix.«

Un jetz kummt de Hammer. Zwää Daach späder geh ich bei uns in die Metzgerei, no heer ich, wie die Metzgersfraa zu de Schneiders Hedwig saacht: »Hänn Sie des schun gheert vum Karl?« Do hawwisch mich awwer oimische misse.

»Ja, woher wisse dann Sie des schun widder?«, hawwisch se gfroocht. No saacht die, a ich hätt re des doch selwer verzeht. Awwer do war de Lade zu klää, des kann ich eich saache.

»Wer? Ich? Des is doch gar net wohr«, hawwisch gedobt. »Ich werr jo wohl noch wisse, was ich wem verzeht hab.« Ich mään, ich verzeht jo sowieso nix weider. Also eich jetz schun – do wääß ich, dass des unner uns bleibt. Awwer sunscht net. Un dann saacht die so was. Do kräächt mer en Ruf! Ich bin doch net s Daachbläddel vun de Siedlung. Die hot des bstimmt verwechselt. Des werd die Hilde gewese soi, wu derre des verzeht hot. Die kann jo sowieso nix fer sich behalte. Ich mään, mir hot ses jo aa gsaat. Awwer Schwamm driwwer. Ich will do kän Krach afange. Des kann jedem mol bassiere, dass er sich errt.

Nur wer mich arg, arg enttäuscht hot, des war moi Freundin, die Magret. Wieso? Alla, ich verzeht s eich. S is jo egal. Un zwar war des so. Ich geh zu derre hie un saach: »He-a, Magret, ich verzeht der mol was vum Karl. Des muss awwer unner uns bleiwe.« Jetz frooch ich eich, is des zu viel verlangt?

Ich mään, rumverzeht hot ses net. Was die gemacht hot, des war viel schlimmer. Saacht die doch zu mir:

»Wann des unner uns bleiwe soll, no behaltscht s am beschde fer dich.«

Ich war wie vor de Kopp gschlache. Des hätt ich net gedenkt, dass die Magret moi Vertraue so wennisch zu schätze wääß. Nie mehr verzehl ich derre was. Awwer saachen nix, gell. Ich mecht net, dass sich des rumspricht. Un falls eich doch emol rausrutsche sollt, wie schofel die Magret mich do behandelt hot – vun mir hänner des net!

Äner geht noch

He-a, bin ich so froh, wann s widder bissel kiehler werd. Ich mään, in derre Hitz vertragscht jo nix un wann d noch fahre muscht ... Vun wege: Äner geht noch? Peifedeckel! Do hockscht dann owends gemietlich in de Gaadewertschaft vor doinere dritte Flasch sauer Wasser. Ja, ich wääß, des saacht mer nimmi. Es hääßt jetz Mineralwasser – awwer dodevu schmeckt s aa net besser. Jedenfalls irgendwann – die Leit um em rum grinsen so genisslich in ihr Bier – do hawwisch immer en innere Zwang, endlich ebbes zu trinke, was wennigschdens aussieht wie Alkohol. Wu ich deletscht uff moi Freundin, die Hilde, gewaad hab, is mer s aa so gange. No hawwisch die Bedienung gerufe un hab gsaat: »Ich hätt gern en alkoholfreie Wääzeradler.«

Die guckt mich aa un schittelt de Kopp.

»Des hämmer net.«

»Awwer ihr habt doch alkoholfreies Wääze?«

»Ja, wolle Se ääns?«

»Nää, ich will en Radler.«

»En normale?«

»Nää, en alkoholfreie.«

»Des hawwisch Ihne doch gsaat, des geht net.«

»Un warum net?«

»Des alkoholfreie Wääze is in de Flasch.«

»Äh, un wann Se die uffmache deede?«

»Des is jo s Problem. Dann isse offe.«

»Hä?«

»Ich kann Ihne hegschdens e alkoholfreies Wääze un e Limo bringe un Sie schitten des dann selwer zamme. Annerscht geht s net.«

»Wieso, wie machen en ihr eiern Wääzeradler? Net aus Wääze un Limo?«

»A doch ...«

In dem Moment is endlich die Hilde kumme.

»Ich nemm en alkoholfreie Wääzeradler«, hot se schun vun Weitem gerufe.

»Des hänn die net«, hawwisch gsaat.

»A doch«, hot die Bedienung gemäänt, »wann sie aa äner trinkt, dann geht s widder.«

»Verstehscht du des?«, hawwisch die Hilde gfroocht.

»A jo«, hot se gsaat. »Des alkoholfreie Wääze is doch in de Flasch. Wäscht du des net?«